

遜國忠紀卷之九

華陽周 鑣仲 編次

縣

沛縣知縣顏伯瑋 附子有為



顏伯瑋名瓌以字行江西廬陵人唐魯公真卿之後聰敏介直能文章洪武末舉賢良除知徐州沛縣靖難兵起所過郡縣皆附伯瑋聞之獨以死誓時李景隆統兵往禦駐德州伯瑋率淮北數縣民夫餽運措畫有方未嘗缺乏而民不告勞辛巳六

通國史綱 卷九
月北兵掠濟寧游兵過沛沛人竄匿伯瑋設法招
徠之會設豐沛軍民指揮司集民兵五千人築堡
備禦伯瑋躬自教閱時加激厲皆爲精兵尋調三
千人益德州兵壬午正月北兵駐沙河二十二日
轉攻沛伯瑋遣縣丞胡先百戶邵彥莊間行至徐
告急都督援兵不至度不能支預令其弟瑀子有
爲還曰汝歸白大人吾不能盡子職矣因題詩御
史行臺壁曰太守諸公鑒此情只因國難不能平
丹心不改人臣節青史誰書縣令名一水豈能支

大厦三軍空擬築長城吾徒雖死終無憾望采民
艱達 聖明是月二十六日夜二鼓靖難兵入東
門指揮王顯迎降伯瑋冠帶升堂南向慟哭拜曰
臣無能報國遂自經死時年五十其子有爲不忍
去復還見父死遂自刎以從瑀脫走濟寧逾月還
沛詢邑人知縣丞胡先已收葬伯瑋父子於沛南
關外乃至徐告伯瑋友人晏璧璧與伯瑋同宦於
徐因爲伯瑋傳其事言伯瑋善事父母友兄弟睦
族姻鄉黨稱其六行無異詞以故守令知而薦之

遼國忠純 卷九
及令沛數以事至徐又同督運德州每連牀共食
談誦慷慨練達機宜深喜鄉鄰之有人屬縣之得
賢長吏也古語云謀人之軍師敗則死之謀人之
邦國危則亡之若伯瑋寄百里之命視死如歸賢
於人遠矣正統中御史彭勗至沛問伯瑋葬處令
有司起墳立祠祀之

樂平知縣張彥方

張彥方江西龍泉人建文初繇給事中以便養告
改樂平知縣靖難兵起勤王詔下彥方奉旗糾義
起兵一邑響應有武弁沮之彥方大哭曰君父在
水火吾可自緩乎遂率所部抵江口遇靖難游兵
執至樂平梟首暴屍譙樓時暑月經旬顏面如玉
無一蠅玷集人謂忠義所感父老竊葬縣治之清
白堂後

蕭縣知縣鄭恕

鄭恕字本忠浙江仙居人治尚書能賦詩工字畫
好古博雅家甚貧釜魚甌塵一毫不妄取蕭然斗
室日與學徒數十人講論經理高風勁節一時傾
嚮之寧波知府聘爲昌國訓導尋陞知蕭縣甚得
民心建文四年靖難支將王聰攻破蕭恕不屈死
之年五十六後籍其家二女當配亦死之子濂湜
姪溫汲謫北平種田或曰恕嘗有平幽燕疏歸起
義兵時無應者遂往就戮蓋事定加刑也台州祀

遜國忠統 卷九
四
恕八忠祠邑祠祀恕及其二女

獻縣知縣向朴

向朴字遵博浙江慈谿人宋文簡公敏中十四世孫父壽宗慈湖之學學者稱爲樂齋先生朴得其傳行務實踐力學養親洪武二十五年命督府都事張允直訪求人才以朴應詔陞見

帝問居家何爲對曰種田其容秀而文

上心知其非耒耜中人也因詢大麥何以四節對曰以其占四時耳授獻縣令單車就道不携妻子時兵燹餘爲闢荆榛畚瓦礫教百姓農桑與同甘苦

流移漸復業靖難師起獻當兵衝無城郭朴集民兵激以勇奮與北將譚淵迎戰衆寡不敵被執懷印死年四十三獻民哀之拾遺骸葬道左後陳瑛爲都御史瑛獻人也懷怨死事諸臣最深請究治不已有楊姓者父子懼發掘負骨潛葬邑北十里永樂初王中秘尹實北上詢得葬所夜夢朴服血污葛衣共談往事起秉燭爲文乘星月往哭之洧川令韓彥起匿其二子於任司諫顧道輯其遺事書於寶峰菴佛座三人者皆義士也二子道

淳道徵道淳被徵稱痼疾不赴有王偉元攀栢悲號之風嘉靖間朴祀本縣鄉賢祠隆慶五年又祀獻縣名宦祠萬曆初奉

詔撫按建祠本縣北門外王尹實韓彥復顧道附祀別室獻民楊氏殿食焉

沛縣主簿唐子清

唐子清沛縣主簿不知何許人在沛有善政民愛之知縣顏伯瑋守沛專調兵食一切邏察事皆付子清靖難兵執子清欲殺之將兵者欲且留子清曰吾願從顏令於地下死之

沛縣典史黃謙

黃謙不知何許人以儒生爲沛典史果敢能戢下
知縣顏伯瑋禮遇之益効力盡職靖難兵欲執至
徐招降謙感顏知己願同死死之

永清縣攝縣事典史周縉

周縉字伯紳湖廣武昌人洪武中貢入太學初授
永清典史居官廉謹攝令事捕蝗弭盜靖難兵起
一時守令多迎降永清地尤近燕縉極力爲拒守
計顧其民寡弱爭先逃散縉度不可爲懷印南奔
將他圖焉道聞母喪還家以禮葬畢卽出糾義旅
勤王戰艦戎器畧具則聞南師燔而天命去矣縉
乃走匿民間已而蹤跡漸露有司卽其家捕獲械
送京師縉自分必死慷慨就行至則 朝廷特下

之獄久之謫戍興州居數年子代還屏迹田園年八十終吳文定寬爲縉傳有日以愧世之爲丁公而倖免者是時吏部言前北平屬州縣官朱寧等二百九十人當皇上靖難時俱棄職遠避宜寘法典俱逮戍縉其一也寧等不可殲矣

儒學官

漳州教授陳思賢

陳思賢廣東茂名人質直好義洪武末爲漳州教授以忠孝行誼勗諸士多所成就

文皇靖難詔至思賢慟哭曰明倫之義正在今日遂堅卧不出迎率其徒伍性原等六人卽明倫堂爲舊君位哭臨如禮郡人執送京師思賢死之六生咸以身殉或曰死於道嘉靖中提學副使邵銳立祠祀之

青州教諭劉固

附弟國子超

劉固字永貞陝西真寧人以儒士授山東青州教諭建文元年固以母老乞歸許之耿清爲都御史以書招固蓋以真寧地接代境當是時五藩煽亂故也無何靖難兵起固乃移家江右意近京師耳耿清姊適固弟國因與國來京師依耿壬午六月燕王師迫金川門國勸固出城固曰母老甥幼一也况固曾受朝廷厚恩惟有待死而已國語塞然逆知禍必及已乃潛寄甥於王氏十六日城陷

固閉門兀坐又恐驚老母耿公清懷七事覺被誅
罪連姻婭固與弟國妻母同日受刑於聚寶門外
固一子超年十五有勇力一怒縛斷奪刑人刀連
殺十餘人事聞 詔凌遲固年三十六國年三十

四

按劉公姓氏久逸不傳近乃見之拊膝錄而幽
忠紀所載乩仙事尤奇云先是大理徐公署有
神降於箕公詢其名曰劉姓諱固字永貞詢其
世曰建文時人箕停有間若欲秘其事者曰先

生其死難乎曰然不幸罹景清之禍瓜蔓之誅
世所未有景清者耿清也譌爲景又曰一門都
收戮獨有外甥存楊僅離孀乳言之聲亦吞余
在南門能仁寺臨刑詢其齒爵官山東教諭年
三十八詢其里曰往事不必道尋以扇乞書卽
就詩曰且酌樽前酒黃花向坐開不須談往事
致使野猿哀曰先生得無仙乎曰財入童初宮
此崇禎二年巳巳秋也嗟乎世傳顏魯公死而
後猶有遇之於羅浮山者矣遺書達其家則共

驚以爲太史親筆豈誣也哉夫生而忠義歿而
仙靈固其所耳又何疑於劉公焉余猶及見其
憑箕書蹟道雅瘦妙所謂蠶頭馬尾之勢是真
得仙者抑信然耶

濟陽教諭王省

王省字子職江西吉水人洪武五年領鄉薦至京
詔免會試命吏部次第擢用省以親老乞歸養尋以
文學徵

太祖親試稱旨當殊擢省自陳才薄親老乞便養得
浮梁教諭丁艱復改睢陽凡八年又改濟陽靖難
兵至省爲游兵所執從容引譬詞義慷慨衆舍省
省歸坐明倫堂伐鼓聚諸生謂曰若等知此堂何
爲名明倫今且勿多論只說君臣之義何如遂大

哭諸生亦哭省以頭觸柱死後有司立祠學官祀之

德化教諭豐寅初

豐寅初字復初鄞縣人洪武中爲國子監司業抗疏諫燈謫德化縣教諭建文壬午棄官躬耕年百有五歲子慶給事中孫熙狀元

開封訓導林大同

林大同字逢吉其先長樂人曾祖以下皆官常熟
因家焉大同幼孤苦力學六經子史手自抄讀不
問寒暑洪武中爲開封訓導以病歸永樂中再遣
人取召卒以疾辭所著易經與義并文藁若干卷

遜國忠紀卷之十

諸王府

燕府長史葛誠

葛誠未詳何許人以進士爲燕府長史靖難師未起

文皇使誠入奏事覘

朝廷所爲

建文君密問燕

府事誠具以實告

建文君乃遣誠還燕使爲內

應師將起誠切諫不聽及

詔讓燕

華陽周

鑣仲馭編次

文皇稱病盛夏擁火猶自謂寒甚張昺等入問疾誠
密言王無恙以不得上心故宜爲備誠又密疏
以聞會燕人奏事京師執下獄得燕謀蹤跡卽發
符逮燕府官校又令昺等發兵內應盡簿錄府中
人
文皇大恨殺誠夷其族

寧府長史石撰

石撰山西平定州人洪武中爲寧府長史靖難師
至所過郡縣皆下撰在大寧獨欲爲守備計及北
師拔大寧執撰終不屈遂支解

按平定州志載撰洪武中爲寧府左長史太
宗靖內難諸郡縣皆下江西城獨爲守備上
怒攻拔之得撰不爲屈遂支解而死此恐失實
計寧始封乃今之大寧與太宗同起兵渡江
因不之國江西之封乃在永樂中安得撰守備

遼國忠紀 卷十
江西耶當是約兵之日在大寧盡節不應繫之
江西忠節錄辨之審矣

遼府長史程通

程通字彥亨徽州績溪人祖平業儒洪武初以鹽
法坐繫御史廉其非臯喻旁引他人可免平起對
曰某不幸爲人所誣而又誣人欺天矣寧以身待
罪御史嗟異竟謫戍延安有同謫而旅死者平遺
子以誠負遺骸歸其家其家以貧故不納乃買地
葬之通少有至性嗜學執禮洪武乙丑通以縣學
生應貢入太學明年以父以誠死嶺南免歸徒步
扶櫬還葬廬墓哀毀至妻子不能識戊辰復上太

學時平戍延安年已大耄通上書言臣壯而無父
祖猶父也臣祖老而無子孫猶子也祖孫更相爲
命願代其役辭極哀懇

高皇憐之而持其章不下陰召平至并召通東西立
高皇指平顧通曰汝識此人否于是祖孫相持而泣
哽咽不能仰視

高皇嗟嘆良久命兵部除其籍驛送平還鄉庚午通
舉應天府鄉試時遣諸王將兵行邊以封建策諸
貢士于廷獨通對稱 旨置第一除遼府紀善辛

未從王闕武臨清壬申從王之國遼西時王府未
建以祖喪免歸復廬墓三年服闋復任未幾

高皇上賓庚辰從王渡海來朝辛巳進左長史明年
從王之國荊州悉心輔導王敬禮之凡國事必咨
焉府中衛士紀綱者以狡佞幸于王通屢笞戒之
會

文皇舉兵靖難潛遣人至荊州通草上封事乞防禦
北兵數千言

文皇卽位綱入賀留侍爲錦衣衛指揮使數被顧問

乘間言通曩有封事指斥乃 詔械通至庾死獄
 中家屬發戍極邊簿錄其家得田數十畝遺書數
 百卷牯皮數張績溪之程最衆幸使者仁恕不芘
 及初遼王雅重通命圖其像又錄其世譜親為贊
 之後十年通異母弟彥廸以事至荊州王召見之
 語及舊事曰汝欲見汝兄否彥廸頓首不知所對
 王出遺像示之彥廸哭失聲并請其世譜以歸永
 樂中有仇家欲訟之者適彥廸他出家人懼而焚
 其像獨遺其世譜云通初讀書即勵志聖賢之學

居常恂恂如有弗逮至臨事則毅然莫能奪故所
 立如此為詩文不求異而主於理然辭氣超越專
 工者反不能及有稿百餘卷悉毀於官

按弇山別集云遼王渡海至京推戴後以壬午
 九月奏言遼地荒遠請徙國荊州 詔從之是
 時 文皇即大位久矣乃謂 文皇舉兵靖難

遣人至荊州通草封事上之何耶又紀綱者山
 東臨邑書生也而以為遼府護衛乎似此則本
 傳不能無誤矣夫通之有忤於燕意或佐遼時

有之當不於荊州也爲附記以俟知者

晉府長史龍鐔

龍鐔字德剛江西萬載人洪武十七年貢爲國子
生授浙江副使以徵累降長洲知縣尋陞晉府長
史靖難師起徵兵於晉鐔以大義不可靖難後
詔械鐔至不屈死之有收其遺骨得所自書贊曰捐
生固殞弗事二主別父與兄忍慟肝腑盡忠爲臣
盡孝爲子二端於我歸於一所衣色形骸歸於故
土

谷府長史劉璟

附子籍

劉璟字仲璟文成公基子也沉涵經傳喜談兵究極韜畧握奇諸書偉貌豐髯議論英發甌賊葉丁香叛延安侯唐勝宗討之決策於璟破賊還薦璟才畧

高皇喜曰璟真伯溫見矣 召見謂曰朕欲汝日夕左右考宋紀惟閣門使立百官上以宣達爲職處爾無逾此官者遂授之以剛直聞會谷王就封上謂侍臣曰谷王年少誰可羽翼者諸大臣故忌璟

對曰閣門使劉璟忠勇果敢可任乃授谷府長史
谷邸在宣府璟設險足兵諸胡屏息嘗至燕

文皇與璟奕璟勝

文皇曰卿獨不少讓我耶璟正色曰可讓則讓不可
讓璟不敢讓也靖難兵起璟馳還京獻十六策不
聽令叅李景隆軍事景隆又不聽景隆戰敗璟夜
半渡蘆溝河冰陷馬斃璟力跳躋岸冒雪走良鄉
趾爲之裂跋行三十里璟子緡自大同赴難越良
鄉至涿州遇璟翼璟上馬奔還家養疾後輿疾赴

闕進聞見錄千萬言又不聽令璟還家以俟

文皇卽位召璟稱疾不至乃以逃叛親王罪逮至京
入見侃侃不屈但稱殿下且云殿下百世後逃不
得一箇字蓋謂篡也 詔下獄一夕辮髮自經死
法官希旨緣坐其家

上以文成故不許乃得歸葬嘉靖間提學副使萬潮
肖像配享文成祠

按陳中州撰劉璟傳謂 高帝授璟爲閣門使
金書除姦摘佞四字於鐵簡賜之令擊百官不

法者後遷谷府長史提調肅遼慶寧燕趙六府
事鄭莊簡公因而筆之書而王弇州則以爲此
直齊東野人語中州青田人誇大誠意伯家事
而附會之耳不意莊簡之博洽而亦舛誤至此
金書鐵簡此優人彈唱宋八大王事也 高帝
豈以鐵簡賜閣門使乃至谷府長史一小府佐
豈有提調六府之理肅府在甘肅慶府在寧夏
秦王在西安韓王在平涼未就國安能遙制洪
武間趙王杞甫封卽逝時無趙府趙府 文皇

第三子也余挹是言蓋核而衷於道者今爲汰
其傳之謬不存壹循忠節錄所正云

秦府長史鄒朴

鄒朴字爾愚江西吉安永豐人建文初以儒官仕周府直言極諫沮其邪謀王不聽嚴刑禁錮甚密王逆謀覺大臣以朴諫疏聞建文君嘉其忠義召至京具言始末特陞監察御史尋陞秦府長史歸省聞鄒瑾死憤激不食卒時人謂瑾朴爲永豐連璧云

衡府紀善翰林纂修官周是修

周是修名德以字行江西泰和人元季兵亂奉母
避難苦行力學從國子學錄蕭執受詩往返十餘
載學成不仕洪武末舉明經爲霍丘訓導入見

上曰是修問汝年幾何對曰年四十四又問家居何
爲曰教人子弟孝弟力田

上喜擢周府奉祠正逾年從王北征至黑山還每承
命作賦援筆立就思如湧泉王深敬重之遷本府
紀善建文初王以過行聞盡逮府吏詔獄是修以

嘗諫諍得免改衡府紀善衡王者 建文君弟也
當是時尚未之國是修留京預修纂翰林好薦達
知名士數陳論國家大計北兵渡淮與蕭用道上
書指斥用事者誤國用事者怒共挫折之是修屹
不爲動北兵渡江宮中自焚是修留書別友人付
以後事具衣冠爲贊繫衣帶上入應天府學拜先
師畢遂自縊於尊經閣年四十九是修外和內剛
志操卓犖非其義一毫不苟得也嘗曰忠臣不爲
得失計故言無不直貞女不爲死生累故行無不

果乃輯今昔全貞死節聞見所及史籍所遺者爲
觀感錄其學自經史百氏至陰陽醫卜靡不通究
雅好吟哦每朝輒伸紙濡毫作嗚嗚聲文成必先
理致未嘗構思而雍容雅贍詞氣條達所著有詩
小序詩譜集義三卷論語類篇二卷廣衍太極圖
一卷綱常懿範十二卷邇言四卷家訓十二卷別
有芻蕘集進思集十餘卷初是修與楊士奇解縉
胡廣金幼孜黃淮胡儼約同死義後是修首至胡
門見其方令家人飼猪乃亟退獨身踐之竟無一

如約者既死陳瑛言其不順天命請加追戮
文皇曰彼食其祿自盡其心耳置不問後楊士奇為
作傳語其子轅曰當時我亦同死誰為爾父作傳
聞者以為笑萬曆中修撰焦竑言于督學御史饒
位即是修死所立祠祀之

燕府伴讀 逢辰

俞逢辰字彥章寧國宣城人為燕府伴讀靖難兵
未起逢辰頗聞其謀遺書示子自分必死及起兵
逢辰泣諫死之

參軍斷事

高巍

高巍山西遼州人母蕭老而痼疾巍奉湯藥不懈母亡廬墓疏食三年洪武十五年貢入太學十七年舉孝行 詔旌其門尋授前軍都督府試左斷事上疏欲墾河南山東北平兵後荒田及抑末技慎選舉惜名器數事

高廟嘉納之後因斷事不稱 上旨當罪以議賢謫戍貴州關索嶺仍許以姪代役建文初上疏陳情

乞放歸里許之既而遼州知州王欽應詔辟魏赴
銓曹上書論政事借漢爲喻畧曰昔漢高帝提三
尺劍滅亡道秦大封同姓分王天下之半雖曰遠
慮然卒遺文景以不治之痼疾賈誼所謂股大於
腰指幾於股者也賴文帝寬厚含忍容之尚不免
尺布斗粟之謠景帝之寬厚既已弗類孝文又輔
以晁錯之深刻徑削諸侯遂挑六國之禍向非命
將得人民心輔漢則社稷危矣

太祖皇帝之起與漢高同而神武過之法三代之公

封建諸王必先形勢關陝百二山河昔人謂一夫
當關萬夫莫開其民悍勇西鄰吐蕃故以藩王之
長秦府王之山西表裏山河地產良馬其民剛壯
所謂山西出將者也北近胡虜故以晉府王之燕
國雖無名山大川之限其南冀州真定保定順德
廣平大名諸境所謂桑土之野坦平肥沃其北雖
曰沙漠不毛然其地廣畜馬羊其人衣皮食肉馳
射是務遼金殘元藉之而興故以燕府王之四川
僻在西南一隅山河阻深劉備據之虎視吳魏故

通國志終 卷十 十一
以蜀府王之其餘楚湘齊兗寧遼谷代慶肅之屬
以次星列比諸古制雖分封過當然

太祖聖意莫不欲護中國而屏四夷也今各府多驕
逸不法違犯朝制不削則隳紀綱削之則傷親親
之恩此 皇上所難處也賈誼曰欲天下之治安
莫要於衆建諸侯而少其力力少則易使以義國
小則無邪心令海內之勢如身之使臂臂之使指
莫不率從真裁制諸侯之長策也今亦盍師其意
勿行晁錯削奪之策而效主父偃推恩之令命秦

晉燕蜀四府子弟分王于齊兗吳楚湘潭齊兗吳
楚湘潭分王於秦晉燕蜀其餘皆然則藩王之權
不削而自弱矣臣又願益隆親親之禮歲時伏臘
使人饋問賢如河間東平下詔褒賞驕逸不法如
淮南濟北初犯則容之再犯則赦之不改者合親
王告太廟削其地而廢處之豈有不順服者哉修
身齊家宣父明訓睦族和邦帝堯盛德惟上覽察
焉 建文君奇其才會靖難兵起命從李景隆出
師叅贊軍務魏復請使燕曉以禍福感以親親之

遊國忠錄 卷十
一六
誼令其休兵歸藩以代 朝廷數十萬之師遂遣
往魏自稱國朝處士臣某再拜上書燕國大王殿
下魏聞世之所謂大丈夫者以其爲國家排難解
紛上足安宗社下足安黎庶而無一毫微利干譽
之心焉爾魏檮櫟之材遨遊山野經史自娛內有
飽煖之樂外無攘奪之虞沐浴 皇朝之恩厚且
深矣魏雖無丈夫之才而有丈夫之志慕魯仲連
之爲人喜與人排難解紛附名世而不朽也頃我
太祖上賓今 天子布維新之政下養老之詔天下

莫不感悅不意大王與 朝廷有隙張皇三軍抗
禦六師不知其出何名今在朝諸臣文者智籌武
者勇奮執言仗義以順討逆殆無不勝之理魏不
忍兵連禍稔挺身開說以爲逞纖芥之積忿而覆
百萬之生靈豈仁智之爲哉魏有一策解隙以和
使帝者復帝王者復王君臣之義大明骨肉之恩
愈厚乃天下萬世之幸也魏所以置死度外來見
大王欲盡一言求頸血汚地者蓋夙許
太祖以殞首結草之報豈它有求哉昔周公遭流言

居東土以俟成王之悟大王誠解護衛甲兵釋骨肉猜忌之疑塞讒賊離間之口寧不比隆於周公乎慮不及此使任事者得藉口以爲殿下假誅左班文臣實欲效漢吳王倡七國以誅晁錯爲名家必自毀然後人毀之恐一旦奸雄豪傑鳩集亡賴因時乘隙率衆突起而橫擊之萬一有失大王獲罪

先帝矣今大王據北平取密雲下永平襲雄縣掩真定雖易若建瓴但自興兵以來經今數月尚不能

出區區一隅之地較以天下十五而未有一焉大王將士殆亦疲矣况 朝廷以天下無限之師大王以一國有限之衆應之大王同心之士大約不過三十萬大王與今 天子義則君臣親則骨肉尚生離間之疑况三十萬異姓可保終身困迫而死於殿下乎魏每念大王帝室最近之親何至如此未嘗不洒泣流涕也若大王信魏言上表謝罪按甲休兵 朝廷寬宥再修親好天意順人心和太祖在天之靈亦安矣不然執迷不回捨千乘之尊

捐一國之富恃小勝忘大義以寡敵衆爲僥倖不可成之悖事魏不知孰優也况大喪未終毒與師旅其與泰伯夷齊求仁讓國之義不大徑庭乎雖大王有清夷 朝廷之心天下不無篡奪嫡統之議幸而事成固中大王之計萬世公論以大王爲何如倘有蹉跌於斯時也追復愾款之愚其可得歟願大王熟思而審處焉不報魏又上書援周公引詩書反復數千言末云大王論親晁長論行晁賢我朝之周公也當流言之謗亦如周公有碩膚之遜無驕悖之形內輔 朝廷外屏夷狄則周公不得專美於前矣惟我

高皇聖同文王

高后慈同后妃今大王才美同周公輔我天子守成同成王我朝基業同周室豈不盛哉魏白髮書生蜉蝣微命生死不懼久蒙

太祖教養無能補報洪武十七年旌表孝行魏竊自負旣爲孝子當爲忠臣死忠死孝魏至願也如果賜死獲見

太祖在天之靈魏亦有以藉口矣復不報已南軍大
敗魏從景隆收潰卒退保德州尋復集衆戰白溝
河大敗魏於是南奔道遇鐵鉉於臨邑相持慟哭
共矢効死遂趨濟南守城拒退北兵魏賦志喜有
曰至濟南而被圍思張巡之忠堅幸遇知己之鐵
相更從英輩以雲聯若徐將軍之赳赳盛統兵之
桓桓僉憲高公之糾謾大叅宋公之周旋掠陣張
都統之能勇給儲王太守之從權吾道府校之
論議斯文王肯構之勉旃衆資羣策屈力保全盛

統兵者盛庸也餘不可考矣京城破魏縊死驛舍

行軍斷事

錢芹

錢芹字繼忠吳人少好奇節元末以策干諸將不遇洪武初辟大都督府掾從中山王出北平絕漠而還未幾解職家居二十餘年甘貧樂道姚太守善虚心求見芹授一冊竟不交一言而退冊中言勤王事不知其詳也 建文君求直言舉山林巖穴懷才抱德之士善薦芹吉安知府薦蕭用道用道授江府直史芹爲戶部司務留中議事尋署

遜國忠紀
行軍斷
大將軍諮議軍事會遣芹入奏憂憤
道卒將死猶條兵事緩急上執政年七十二賜棺
歛歸葬黃山善後竟勤王

遜國忠紀卷之十一

公

太子太傅魏國公徐輝祖

華陽周

鑣仲馭編次

徐輝祖鳳陽人中山王達長子初名允恭生而白
皙秀眉豐下及長身長八尺五寸顧盼有神舉止
儼雅中山王數鎮北平特留宿衛御家家衆肅然
太祖心噐之命理左軍都督府月廩祿二十石已而
中山王丁北平還疽發背

上命輝祖奉 手詔道迎勞俄王薨又三年爲洪武
己巳始令襲爵魏國公 賜誥稱揚中山王之烈
而勉輝祖忠以立志禮以守身恪盡繼承之道尋
以 皇太孫允炆嫌名改今諱明年 賜黃金三
百兩白金二千兩鈔三千錠文綺二十疋綾十疋
俾還鳳陽 賜第以歲時入覲尋給兵百二十八
爲衛復 賜鈔四百錠明年出陝西防邊自是歲
出練山東河南卒 詔輝祖仍於太倉支歲所受
祿五千石而還其田於官時故元降將阿魯帖木

兒乃兒不花與其部衆隸燕王軍中有異志爲告
者所發

上密詔王訥實而命輝祖以 詔往輝祖之姊王妃
也於是悉得其實與王合筴併其黨悉捕送 闕
下戮之二十九年國子學正吳啟言國子師生日
夥不爲甄別高下無以懲勸

上命輝祖率禮部翰林院臣詣監試其文藝分別送
吏部銓用輝祖嘗侍 懿文太子學通經史大義
又從詹希元學書善大字戊寅閏五月 建文君

卽位因特見信任八月兼太子太傅時建武學於
京師教將臣子弟輝祖與駙馬都尉梅殷往來提
督絃誦大興嘗 召對密言事蓋自

高廟崩諸王世子及郡王在京遺命三年喪畢遣還
靖難將起兵世子及漢趙兩郡王留京師乃稱病
篤以三子請朝議以 遺詔不許旣而屢請 上
以輝祖兄弟屬燕藩內親廼 召輝祖及其弟增
壽議之輝祖執不可增壽獨力爲庇乃悉遣歸北
師起其世子高陽王曾陰餌輝祖爲內應輝祖確

然不撓始改餌增壽輝祖日與齊泰黃子澄盧振
張昺葛誠通謀議二年李景隆北伐輝祖帥師繼
之白溝之敗輝祖爲殿獨全軍而還四年援山東
敗北兵於齊眉山斬其驍將李斌燕人皆懼議旋
師獨朱能不肯遂決意南下會京師傳言燕王已
北歸乃 召還城守未幾靖難兵至江上輝祖又
與開國公常昇分道出師禦戰將士往往離散不
前力屈而返金川門潰輝祖仍率兵巷戰遜國後
羣臣勸進輝祖獨不屈下吏令自書罪狀惟言中

山開國功耳

文皇大怒勒罷尋幽繫而卒年四十或云自裁

文皇曰輝祖與齊泰輩罪同宜論死朕念中山王有大功不可無後令輝祖子嗣魏國公通給中山王歿後祿輝祖長子釋迦保見 賜名欽嗣魏國公遂乞守墓

上怒謫居中都輝祖弟增壽素通欵於北平壬午兵入金川門 建文君手刃增壽於左順門是年謚武陽忠愍侯永樂二年贈定國公輝祖子孫恩數

視增壽常差薄云初高陽王待命京邸輝祖察其異常欲 上留之密奏曰臣觀三甥中獨高煦勇悍無賴自倚騎射非唯不忠抑且叛父他日必爲大患旣而 上不果留高煦瀕行竊入輝祖廐中取其良馬馳去卒之皆如其言萬曆初 詔錄建文死事者各以官稱廟祀之金陵而輝祖居首

侯

越嶲侯俞通淵

俞通淵廬州巢縣人父廷玉開國有功官至僉事
樞密院事攻取安慶沒於陣追封河間郡公通淵
少隨父兄集義旅以舟帥應

高皇帝渡江兄通海功最位平章死於王事封虢國
忠烈公通源以定中原功封南安侯通淵起叅侍
舍人從大將軍征秦隴燕趙陞督府僉事征哈喇
哈至捕魚兒海獲酋長人畜尋轉餉江西充偏將

征都勻龍場諸蠻克辰沅寶慶俘獲多封越雋侯
討建昌叛賊城越雋二十六年坐累奪侯還鄉建
文初召見 上壯之曰老將也授豹韜衛指揮充
偏將從大將軍禦靖難兵號敢戰白溝河之役諸
將兵大敗通淵死之 朝廷悼卹賜葬聚寶山號
國公墓旁以神策衛老軍劉海等守焉命子靖嗣
官尋卒幼子端優給錦衣亦卒靖難後家人懼禍
不敢言襲替事建文末諸將校往往失世官也

大將軍長興侯耿炳文

耿炳文濠州人父君用至正壬辰江淮雲擾所在
盜賊充斥君用彷徨無所歸謂炳文曰吾父子與
其伏山林歛手就戮曷若求豪傑而往輔之乃以
是歲八月謁

高皇於濠城一見被知遇授君用管軍百戶甲午四
月領軍隨

上取滁州六月取城口張營寨取嘉山繆把頭寨七
月克滁城守禦授管軍千戶乙未閏正月從

上取和州守禦授明威將軍管軍總管三月濠舊帥
孫德崖乏糧就食於和因與郭子興有隙甫至卽
他往

上送之孫德崖軍多蓄異志

上大驚疑炳文翼衛甚至竟保無他六月朔從

上渡江風順舟駛頃刻拔采石乘勝徑取太平守禦
時元中丞蠻子海牙集樓船結砦采石衆數萬陳
也先子兆先合淮兵二十萬屯營方山水陸相望
丙申二月從克采石寨獲兵萬餘三月一日破兆

先陸寨降其衆十日取金陵守禦聚寶門父子相
從領軍十七日同父隨徐達取鎮江守禦四月君
用奉命統兵援常之宜興是地與張士誠界勢所
必爭各柵木自營盡死以守君用賈勇騰柵而上
劊甚巨猶力戰不休竟死炳文襲父職仍領其軍
六月取廣德丁酉二月取長興張士誠將趙打虎
以兵三千迎戰敗之追至城西門打虎走湖州遂
克長興獲戰船三百餘艘禽士誠守將李福安荅
失蠻等義兵萬戶蔣義率所部二百人降有儒士

溫祥卿者避亂挈家來歸炳文與語奇之留贊軍
事用其策分兵據要害設戰具爲守禦計三月改
長興州爲長安州立永興翼元帥府以炳文爲總
兵都元帥守之五月士誠遣其左丞潘原明元帥
巖再興來寇屯上新橋炳文擊敗之生擒數百人
斬首甚衆原明等遁去踰四年辛丑十月士誠復
遣司法李伯昇率衆十餘萬水陸並進寇城下城
中兵僅七千敵勢甚盛

上命帳前都先鋒陳德等率建康兵元帥華高等率
宜興兵萬戶費聚等率廣德安吉兵往援之比至
寇兵夜劫營諸軍皆潰炳文嬰城固守明日遣左
副元帥劉成出西門迎擊敗之擒其將宋元帥等
成追至東門敵軍下瞰城中運土石填壕隍放火
船燒水關攻城益急炳文於城中晝夜相持凡月
餘旣而援兵至伯昇棄營遁追斬五千餘人甲辰
九月改永興翼元帥府爲永興衛親軍指揮使司
以炳文爲指揮使十月士誠丞相張士信以兵來
侵炳文破之獲其元帥宋興祖士信憤怒復益兵

圍城炳文復與指揮同知費聚出戰敗之自是士誠奪氣不復敢圖長興矣炳文守長興凡十年孤城血戰卒以無虞其功最大丙午八月

上命伐張士誠先取湖州調炳文往十一月湖州平進圍蘇州諸將分門而軍炳文軍城東北四面困以長圍又架木塔築層樓置弓弩火器於上復設巨砲以擊之城震恐敵兵屢出挑戰屢劒而入吳元年九月城破士誠就擒論功賜采段表裏陞大都督府僉事冬從征中原克山東沂益諸州郡

明年

上卽位改元洪武進功臣秩授鎮國上將軍兼右率府副使三月克汴梁四月克河南府五月召回扈從車駕北巡七月還京師九月同常遇春克大同十月克懷慶澤潞二州十一月大同守禦十二月拔平陽克太原二年二月以其軍從大將軍達征陝西時兩軍夾武功東川而陣思齊在其東思道壘其西日數挑戰蓐食以俟衣甲不少解如是者數月思齊輩力不支相與遁去達旣得其地卽以

炳文守之嚴號令練軍伍築涇陽縣洪渠堰又渠
十萬三千餘丈民皆利焉是年冬大賞守禦功有
白金文幣之賜三年正月開設秦王府授府左相
直言正色多所匡正六月開陝西等處行中書省
命以左相兼行省右丞階資善大夫尋開行大都
督府命署都督僉事十一月大封功臣授開國輔
運推誠宣力武臣榮祿大夫柱國秦王府左相兼
陝西行省右丞封長興侯食祿一千五百石賜鐵
券仍賜文綺及帛四十疋五年以後皆鎮陝西十

三年十二月故元平章乃兒不花等寇邊

上命炳文領軍輔大將軍達討之賜鈔百錠遣行四
月至塞外大破虜於北黃河俘獲人馬數多悉送
達所十五年七月 詔遣巡視陝西城池督軍屯
田十二月炳文計訓練陝西二十二衛校卒凡十
萬六千八百七十四人得驍勇騎士一萬九千七
百九十人習馬二萬三千五百匹十六年雲南平
命往喻征南將軍潁川侯傅友德班師兼視城堡
郵傳籍軍數田糧十九年從征雲南二十年討曲

靖普安諸蠻寇平之二十一年同定遠侯北征獲
故元餘孽及後宮妃后於捕魚兒海

上賜緡緡五萬錠與造第鳳陽鈔二千錠葺先塋黃
金四錠白金四十錠鈔一千錠文段表裏三千疋
復推榮其三世父君用贈榮祿大夫同知都督府
事封長興侯二十五年陝之兩當縣妖人作亂率
兵聲討三年始克之三十二年蜀盜爲亂以征西將
軍往討之擒賊首高佛興俘其衆三千餘人以獻
明年鎮守遼東建文改元靖難兵起命炳文佩大

將軍印自遼東率衆二十萬援真定與北將張玉
朱能戰炳文大敗奔還滹沱河東衆尚數萬十月
復戰衆皆潰炳文死於陣年六十有五炳文老將
善戰至是亦敗歿建文始有憂色代者益非其人
竟至於亾子璿璫皆都督僉事有傳瑄散騎舍人
擢尚寶卿皆獲罪死

按開國功臣錄及革除遺事皆載長興侯耿炳
文歿於陣而吾學編則云炳文固守真定靖難
兵攻城二日不能下而去 建文君乃召還又

云永樂二年刑部尚書鄭賜左都御史陳瑛劾炳文衣服器皿僭飾龍鳳玉帶僭丹鞋 上曰炳文先朝老臣亦爲此其速改炳文大懼暴卒何多異耶功臣錄屬定遠黃金所輯金與炳文爲同鄉其考據必核吾學編問繇傳聞誤耳

歷城侯盛庸

盛庸不知何許人靖難兵起充叅將從長興侯數失利長興侯召還又從曹國公轉戰燕齊間互有勝負建文二年七月鐵鉉守濟南庸夜出劫戰晝憑城防禦盡毀北兵諸攻具捷聞卽軍中陞鉉兵部尚書封庸歷城侯食祿千石充平燕將軍總兵官代曹國公鉉叅贊軍務是年十二月靖難兵至汶上掠濟寧庸移營東昌靖難兵隨至東昌庸背城而陣具列火器藥弩以待燕師方恃屢勝直至

前衝庸左翼不動退而衝其中堅庸麾兵圍

文皇數重會平安兵亦合庸益銳大戰斬其將張玉
大將也燕騎往往有棄甲降者而朱能等率胡騎
奮擊我東北角於是西南漸薄

文皇易服躍馬以出燕兵爲火器所乘大敗走庸軍
復大呼譟擒斬萬餘人燕兵遂北庸趣兵追之復
擊殺無算次日再戰燕又敗步卒先走庸乘之復
殺傷無算北平震動三年三月庸兵至單家橋營
於夾河

文皇率衆至夾河庸結陣甚堅

文皇掠庸陣陣旁火車火鏡強弩戟盾固匝不可動
乃退庸出千騎追襲其後

文皇復率萬騎步兵半之薄庸陣陣終不可動

文皇命步卒攻左掖騎兵擣中堅而其大將譚淵出
兵會擊自中軍來庸因麾諸軍莊得等力戰遂斬
淵及其部下指麾董真保等燕小卻

文皇更以勁騎掩庸陣後朱能張武等從庸軍火器
不及發戰盾又中鐵積相牽不能先後亦小却莊

得楚智皂旗張等皆陷陣以死是夕戰酣迫暮各
歛兵入營

文皇以十餘騎逼庸營野宿明旦引馬鳴角穿營而
去諸將士相顧遲疑不敢發一矢以 上諭旨無
使負殺叔父名也

文皇既還營復嚴陣約戰軍我東北庸軍西南自辰
合戰至未互勝負屢進屢退將士皆疲各少息頃
之復起戰相持不退忽東北風大起塵埃漲空沙
礫擊面庸軍中昏暗不辨咫尺燕兵大呼乘風縱

擊庸軍大敗蹂踐死者不勝計

文皇追奔至滹沱河庸力走得脫遂還保德州靖難
兵長驅至淮上四年春夏間庸南趨靈壁齊眉山
戰皆敗次於淮南六月靖難兵至浦口庸時還京
口率兵出高資港結水寨拒戰靖難後致仕千戶
王欽劾庸罪狀陞欽指揮同知賞銀百兩未幾都
御史陳瑛劾庸口出怨言懷異圖遂削爵庸暴卒

駙馬

駙馬都尉灤城侯李堅

李堅河南武陟人洪武中以功臣英子選尚

太祖第七女大名公主爲駙馬都尉嘗與駙馬歐陽

倫梅殷陸賢賑濟北平 建文君卽位進公主大

長公主堅素負才勇充左副將軍從長興侯耿炳

文北征與靖難兵戰於真定諸將謹備西北北兵

突擊出不意破西南炳文大敗北將丘福進攻子

城堅出接戰互有勝負封堅灤城侯食祿千五百

石與世券已而兵敗滹沱河薛祿引槩中堅墜馬
祿揮刀直向堅堅大呼我李駙馬勿殺祿擒堅見
文皇謂曰爾至親今至此奈何堅無降附意命械送
北平道卒子莊以公主故特宥當嗣公主懼禍繳
誥券莊流寓南京詩酒終其身公主至宣德初卒
或曰堅子莊嗣侯謚威壯弟成爲中都留守改山
東都指揮成子陞世南京衛指揮使

駙馬都尉總兵官梅殷

梅殷河南夏邑人汝南侯思祖從子洪武十一年
尚寧國公主爲駙馬都尉恭謹有謀勤問學能騎
射諸駙馬中

高皇尤愛殷十九年勅殷提督山東學校兼理地方
勅語謂殷篤學精通經史堪爲儒宗後嘗受密命
輔 建文君北兵起殷充總兵官鎮守淮安悉心
防禦號令嚴明及師迫假道過淮殷割使人耳鼻
授之詞曰留汝口與殿下言君父恩義北兵竟不

得道淮安乃渡泗水破盱眙出六合渡江至京師
卽帝位殷尚擁重兵淮上

文皇迫公主招殷公主嚙指血爲書付李中使達殷
殷得書慟哭詢 建文君所在曰去矣殷曰君存
與存君亡與亡吾姑竦之乃還京

文皇謂曰駙馬勞苦殷曰勞而無功
文皇寵賚甚至殷不能平時見詞色

文皇疑之每夜遣小中官潛入殷第察之殷愈怒都
御史陳瑛言殷招藏亡命私匿胡人與女秀才劉

氏朋邪說詛幾得罪甲申冬早朝小舟經竹橋都
督譚深指揮趙曦令人擠殷下水水淺不能沒奮
舟駕其背而死乃言殷自投水死都督許成發其
事

文皇怒罪深曦二人對曰此
上命也奈何殺臣

文皇大怒立命力士持金瓜落二人齒斬之謚殷榮
定初公主謂

文皇實殺殷牽衣大哭問駙馬安在

文皇笑曰爲公主蹤跡賊無自苦乃官其子順昌爲中府都督景福指揮旗手衛僉事賜手書曰朕不念爾母爾安得至今日後俱改孝陵衛指揮使宣德中與世襲孫純舉成化辛丑進士爲知縣忤上官改襲前職官至中都副留守或曰公主嘗移書沮靖難兵

文皇不答兵至淮北與公主書言興師不得已故令遷居太平門外勿罹兵禍公主亦不答公主

高皇后長女後稱大長公主

伎山野記謂駙馬梅殷受遺詔誓劍勉強釋兵以直言取忌忽密旨令駙馬王某募能刺都尉者官超三級王廉知失機指揮許至發到囚四十餘人奏報上大悅令其俟梅早朝到竹橋推以登舟待行渡脚板卽掀擠其下水淺不能沒奮舟駕其背而死大長公主入朝號慟語太宗命卽捕許至等詰問曰汝與梅都尉何仇對曰有旨上怒卽命金瓜槌折其齒併其從皆斬於竹橋以報都尉其三子至今世襲指揮

使云按謀殺梅殷者都督僉事譚深趙曦而發其事者都督許成無所謂許至與王駙馬也茲言誤矣

駙馬都尉都督僉事耿璿

耿璿濠人長興侯炳文子洪武中爲前軍都督僉事尚懿文太子長女江都郡主建文元年郡主進封公主璿爲駙馬都尉掌前府事璿勇悍有武略北兵起以王室懿親得預聞兵事炳文北征璿力勸直搗北平已而炳文戰敗璿怏怏抱病時對公主悲泣建文君遜去杜門稱疾竟以罪論死公主復稱郡主以憂卒

駙馬都尉胡觀

胡觀不知何許人洪武中尚

太祖第十女爲駙馬都尉白溝河戰敗死之

駙馬都尉李祺

李祺韓國公善長之子尚

太祖女臨安公主祺以父罪囚於家建文初赦出守
江浦北兵入城遽投水死

遜國忠紀卷之十二

華陽周 鑣仲馭編次

都督府

都督廖鏞 附弟銘

廖鏞無爲州巢縣人祖永忠從

高廟平中原滅西蜀有功封德慶侯父權嗣封鏞以
適子任散騎舍人歷官至都督建文中與議兵事
時宿衛殿庭靖難後

文皇以廖侯兩子鏞與銘嘗受學方孝孺令召之孝

孺怒曰汝讀幾年書還不識箇是字兩子復命
文皇大怒令收孝孺至命以刀抉其口兩旁至耳刑
之聚寶門外凡七日罵聲不絕廖兩子拾遺骸葬
聚寶門外山上甫畢而廖氏亦見收兩子逃去永
樂元年四月錦衣衛鎮撫司奏獲鏞銘送刑部論
死鏞弟鉞及從父淮安指揮僉事昇俱謫戍邊鏞
母湯氏東甌王長女也并銘女送浣衣局

都督同知孫岳

孫岳洪武中從大將立功官至都督同知建文中
充鳳陽守將靖難兵起大修戰守器械撤寺材爲
戰艦樓櫓戈甲咸有法式列寨淮西水陸有備靖
難兵竟從下流渡淮至盱眙及金川門不守岳猶
堅守中都永樂元年法司劾岳逮至京安置海南
死

都督僉事耿獻

耿獻長興侯炳文仲子官至後軍都督僉事靖難兵起與江陰侯吳高及楊文率遼東兵圍永平不克退保山海關吳高被間奪兵徙廣西楊文守遼東獻數請攻永平以動北平文不聽靖難後獻論死

都督寧忠

寧忠累官都督建文元年充征虜右副將軍與駙馬都尉李堅從大將軍至北平八月及靖難兵戰於真定敗奔滹沱河又敗與都督顧成都指揮劉遂皆被執忠之妻都督徐凱女也後與凱皆不知所終

都督陳暉

陳暉始爲洮州衛指揮累功至都督充副總兵與靖難兵戰真保滄德間互有勝負已而戰敗被執送北平後不知所終

都督余瑱

余瑱北平衛指揮使建文時歷官都督初與謝貴密謀不遂貴死瑱走保居庸關時宋忠承制令瑱守之瑱簡練關卒得數千人將進攻北平

文皇曰居庸險隘北平之咽喉瑱若據此則拊我背宜急取之緩則增兵繕守後難圖矣令指揮徐安鍾祥千戶徐祥等擊瑱瑱且戰且守援兵不至棄關走懷來依忠忠又收北兵給曰石頭城亦破矣瑱曰石頭城便破吾亦不舍懷來力盡被執不屈

死

都督同知陳質

陳質不知何許人歷官江西都指揮使有威名建
文初充叅將守大同尋陞中府都督同知發代府
陰事代簡王獲罪靖難兵出懷來質以西師助宋
忠忠敗退守大同靖難後被執不屈

文皇曰質奸人害代王者遂誅質

都督潘忠

潘忠不知何許人歷官至都督將兵屯鄭州時燕師破雄縣都指揮楊松戰死

文皇度潘忠在鄭州未知城破必引衆來援遂命領兵千餘渡月漾橋伏水中又令軍士數人伏路側望見忠等接戰卽舉砲旣而忠果至

文皇進兵逆擊之路旁砲舉水中伏兵亦起據橋忠戰敗急趨橋不得北兵腹背夾擊被執死之

按遜國臣記但云潘忠戰敗被執未詳其終革

朝遺忠錄謂其死之當有據耳

都督僉事徐凱

徐凱字子安廬州合肥人父興以開國功累官成
都前衛指揮使凱襲與職爲茂州衛指揮使守松
藩頻著戰績洪武二十六年出掌鹽井衛事征賈
哈刺有功歷陞都督僉事鎮守四川階文官軍叛
會都督審正討平之又克征虜大將軍從沐春討
刁幹孟有功建文元年從大將何福征百夷爲副
總兵靖難兵起從宋忠北進練兵臨清二年十月
吳傑平安守定州盛庸守德州凱及陶銘守滄州

爲犄角

文皇自通州直趨滄州凱大戰不勝入城東門之卒先潰餘衆盡降凱遂被執先是

文皇聲言征遼東凱等諜知之信以爲實然也

文皇廼三更起程一晝夜行三百里遇哨騎盡殺之食時掩至滄州凱猶不知督軍運土築城如故及兵至城下始覺亟命分守城堞衆皆股栗倉皇無措燕兵四面亟攻

文皇麾壯士繇東北登踰時遂拔其城先遣兵斷其歸路生擒凱及都督程暹都指揮俞琪趙濟胡原李英張傑將校百餘人凱不服械送北平莫攷其所終

按遜國臣記云凱等被執 文皇飲之酒遣歸凱等謝願留事殿下令往北平仍其官祿靖難後暴卒夫既已效順後復死狀未明何也將無傳聞之誤乎忠義流芳所載莫攷其終之言審矣